



Broj: 01,02, 03,03/11-05-1-145/15  
Sarajevo, 31.7.2015.

**KOLEGIJU PREDSTAVNIČKOG DOMA PSBiH  
KOLEGIJU DOMA NARODA PSBiH  
KOLEGIJU SEKRETARIJATA PSBiH**

**Izvještaj sa 41. godišnjeg zasjedanja Parlamentarne skupštine Frankofonije  
Bern, Švicarska,  
6.-10. juli 2015.**

U Bernu je od 6. do 10. jula 2015. održano 41. godišnje zasjedanje Parlamentarne skupštine Frankofonije (u daljnjem tekstu: PSF) u čijem radu je učestvovala i Delegacija Parlamentarne skupštine BiH.

PSF je osnovan 1967. godine u Luksemburgu s ciljem zaštite i promoviranja francuskog jezika na parlamentarnom nivou da bi danas prerasla u savjetodavno tijelo koje okuplja parlamentarce koji govore francuki jezik i koje donosi vrlo važne političke, ekonomske, socijalne i odluke koje se tiču kulture i jezika. PSF ima 79 država članica koje su podijeljene u tri grupe: stalne članice, pridružene članice i zemlje posmatračici u koju spada i Bosna i Hercegovina. Skupština ima četiri komiteta: Politički komitet, Komitet za politička pitanja, Komitet za obrazovanje, komunikacije i pitanja iz kulture te Komitet za saradnju i razvoj. Ovogodišnjem zasjedanju u Bernu prisustvovalo je oko 300 delegata iz oko 50 delegacija.

Ovogodišnjem zasjedanju PSF-a prisustvovali su članovi Delegacije PSBiH u PSF-u Milica Marković i Damir Arnaut.

Tokom ovogodišnjeg redovnog zasjedanja, a prije plenarnog dijela, održani su sastanci Biroa, Mreže žena parlamentarki i komiteta.

Na sastanku Mreže žena parlamentarki održanom 7. jula 2015. usvojene su odluke sa sastanka Mreže održanog 6. februara 2015., zatim je usvojen izvještaj o aktivnostima Mreže za period februar - juli 2015. godine. Nakon toga su predstavljeni prijedlozi izvještaja i doprinosi izvještajima koji se izrađuju i to o temama: Žene i porodica, Obrazovanje djevojčica, Isključivanje djevojčica iz škola, Opismenjavanje odraslih žena i Žene i informaciono-komunikacijske tehnologije. Zatim se raspravljalo o monitoringu provođenja Konvencije o eliminaciji svih oblika diskriminacije nad ženama, zatim nadgledanju napretka vezanog za učešće žena u frankofonim parlamentima, te o ratifikaciji Konvencije o sprečavanju i borbi protiv nasilja nad ženama i nasilja u porodici (Istanbulska konvencija). Članovi Mreže su zatim saslušali prezentaciju nove politike u vezi sa sprečavanjem i

upravljanjem situacijama vezanim za uznemiravanje na poslu u Kvebeku te aktivnostima koje je vodila Mreža žena PSF-a u okviru dvadesete godišnjice Pekinške deklaracije. Zatim je predstavljena izjava o namjeri za saradnjom između Mreže žena parlamentarki PSF-a i Frankofonske mreže za ravnopravnost žena i muškaraca. Članovi mreže su zatim raspravljali o važnosti uzimanja u obzir pitanja spolova prilikom rasprava o klimatskim promjenama. Na kraju sastanka su predstavljene informacije o saslušanju Michaëlle Jean, generalne sekretarke Frankofonije, te o imenovanju novih članova Komiteta direktora Mreže.

Komitet za politička pitanja, u čijem radu je učestvovala gđa Marković, raspravljao je o političkoj situaciji u frankofonskim regijama, strategiji digitalne frankofonije te o ulozi parlamenata u pristupu pravosuđu u frankofonskom području. Zatim su razmatrani prijedlozi novih tema za izvještaje, revizija Poslovnika PSF-a, a usaglašeno je pitanje koje će se postaviti generalnoj sekretarki Frankofonije i konstituiran je biro Komiteta za period 2015.-2017.

Komitet za obrazovanje, komunikacije i pitanja iz kulture u čijem radu je učestvovao i gosp. Arnaut raspravljao je o aktivnostima Parlamentarne mreže za borbu protiv side, tuberkuloze i malarije. Zatim su se članovima Komiteta obratili predstavnici Frankofonskog parlamenta mladih koji su govorili o tome da li su obrazovanje i studiranje na francuskom jeziku još uvijek prednost. Na sastanku Komiteta se zatim raspravljalo o prijedlogu izvještaja o digitalnoj frankofoniji, odnosno razvoju visokog obrazovanja putem interneta te obezbjeđivanju uslova kako bi svi imali pristup takvom obrazovanju. Komitet je još raspravljao i o provođenju Konvencije o zaštiti i promociji različitosti kulturnog izražavanja, zatim o pristupu parlamentarnim informacijama kako bi se izabrani zvaničnici približili građanima te o milenijskim ciljevima vezanim za obrazovanje. Također, govorio je i direktor televizijskog kanala TV5MONDE, a vezano za napade na novinare tog kanala.

Plenarno zasjedanje su svojim govorima otvorili: Stephane Rossini, predsjednik Nacionalnog vijeća Parlamenta Švicarske, Paul. E. McIntyre, predsjednik Parlamentarne skupštine Frankofonije, Claude Heche, predsjednik Vijeća država Parlamenta Švicarske, Michaëlle Jean, generalna sekretarka Frankofonije, te Didier Burkhalter, šef švicarskog Federalnog odjela za vanjske poslove. Svi su naglasili važnost i značaj koji danas u svijetu uživa frankofonija i to u svim oblastima života, a posebno na povezivanju naroda i na njegovanju jezičkih različitosti. Također je istaknuta velika važnost koju u ostvarivanju ciljeva frankofonije imaju parlamentari, i na globalnom nivou i u svojim nacionalnim parlamentima.

Generalna sekretarka Međunarodne organizacije Frankofonije gđa Michaëlle Jean obratila se članovima PSF-a, nakon čega je odgovarala na pitanja članova Skupštine. Nakon gđe Jean, na plenarnom zasjedanju svoja su izlaganja imali gosp. Pascal Terrasse, parlamentarni generalni sekretar PSF-a, te šef finansija PSF-a Michel Walter, nakon čega je usvojen finansijski izvještaj za 2014. godinu i rebalans budžeta za 2015. godinu.

Članovi PSF-a zatim su ratificirali partnerske sporazume, razmatrali provođenje rezolucija usvojenih tokom plenarnog zasjedanja u Ottawi prošle godine, nakon čega su predstavljeni

izvještaji sa sastanaka komiteta te se raspravljalo i glasalo o prijedlozima rezolucija i preporuka.

Zatim je otvorena rasprava o glavnoj temi ovogodišnjeg zasjedanja a to je podsticanje i omogućavanje da svi imaju pristup kvalitetnom obrazovanju što predstavlja prioritetan izazov za frankofoniju.

Potom su predstavljani izvještaji Mreže žena parlamentarki PSF-a te izvještaji o aktivnostima otpravnika regionalnih misija.

Također su razmatrani i multilateralni planovi za parlamentarni razvoj za Madagaskar i Mali.

U okviru ovogodišnjeg zasjedanja, održana je i zajednička sjednica Parlamentarne skupštine Frankofonije i Frankofonskog parlamenta mladih na kojem su predstavljene rezolucije koje je usvojio Frankofonski parlament mladih na svom 7. zasjedanju koje je također održano u Bernu istovremeno s plenarnim zasjedanjem PSF-a. Među učesnicima Frankofonskog parlamenta mladih proglašeni su i pobjednici u govorništvu.

Zasjedanje je završeno izborima na neke od funkcija u Parlamentarnoj skupštini Frankofonije. Za novog predsjednika PSF-a izabran je Aubin MINAKU NDJALANDJOKO, koji je inače predsjednik Nacionalne skupštine Demokratske Republike Kongo.

Saopćeno je da će naredno redovno godišnje zasjedanje Parlamentarne skupštine Frankofonije biti održano u Antananarivu (Madagaskar) od 8. do 12. jula 2016., nakon čega je zatvoreno 41. redovno zasjedanje u Bernu.

### **Izvještaj pripremio:**

**Adnan Bešić**

**Sektor za međunarodne odnose i protokol PSBiH**

Dostaviti:

- naslovu
- Komisiji za vanjske poslove Predstavničkog doma PSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću
- Sektoru za međunarodne odnose i protokol